

# Lo mai jove



Los contes avançan sus un ritme ternari. Sovent, al tresen còp, se trapa la clau, la solucion, lo desnosament. los gojats son tres e lo caganis es lo mai aluserpit. Los ainats pòdon èsser braves mas mancan de saupre-viure. Carcanhats per l'objectiu, veson pas lo monde que lor i poiarián balhar un còp de man. Se daissan prene coma de gafets pel mostre o per la brèissa... Se son missants, s'avisaràn que la fòrça e la violéncia ofrisson que victòrias sens endeman. A la perfin, la bontat e lo biais ganhan la partida. Lo mai jove, el, sap escotar, gaitar, partejar, balhar... e n'obten recompensa.

